

虛皇天尊初真十戒文

謹按

虛皇天尊言出家超俗皆宿有良契故能獨
拔常倫若慎終如始精至修鍊當福及七
祖慶疏一門所謂九層之臺起於累土千

里之行始於足下入道之門積德之基亦
必由此始開度之時宜受初真之戒其戒
有十爾當受之

第一戒者不得不忠不孝不仁不信當盡節
君親推誠萬物

雨三

四

按傳曰仙經萬卷忠孝爲先蓋致身事

君勤勞主事所以答覆庇之恩也修身慎
行善事父母所以答生育之恩也事師如
事父母所以答教誨之恩也民生於三事
之如一乃報本之大者加以仰不愧於天

俯不作於人敬信神明所以答造化之恩也併前三事謂之四恩至於祝

國延禧除妖却害化民爲善裨王化之所未及乃出家之忠也生則誘其親以惜福向道死則爲之遷神福鄉其處已則離諸

恩愛息諸塵緣專精一心勤於學道道功既就則雖億劫種親皆得超度上可以報四重之恩下可以濟三途之苦廼出家之孝也至於不仁者欺心安作越禮非爲不信者虛誕自矜華辭惑衆要當知大心者

不昧其心至一物不欺大孝者不悖於理
至一體皆盡然則一語欺心非忠也一事
悖禮非孝也故忠孝爲諸戒之首百行之
源學者之先務也若能依上遵守而行則
可以盡節

兩三

君親推誠萬物矣

第二戒者不得陰賊潛謀害物利己當行陰
德廣濟群生

夫陰賊潛謀者是暗中使人爲非教唆詞
訟之謂也令人入於陷阱憲網之中而自

得快樂害物利己之念迨不可勝言若或
返照廻光化人爲善則廣陰德普濟群生
斯廼入道之第一義也

第三戒者不得殺害含生以充滋味當行慈
惠以及昆蟲

蓋不殺生者所以存仁愛也夫禽獸旁生
性命同稟有夫婦之配有父子之情有巢
穴之居有飲食之念愛憎喜懼何異於人
能懷惻隱之心不忍殺戮而食以證慈悲
之行不亦善乎或心雖仁民愛物而迹迺

混俗衆中有所未便則不起意殺不下手
殺不眼見殺三淨是則飲食隨緣又何殺
生之有且聖賢於肉食固未常必其有无
而仁愛之及物亦何常間乎彼此如網解
三面迹遠庖廚釣而不網弋不射宿啓蟄

不殺方長不折德惠之普人蟲草木一視
同仁後之不肉食者果能然乎又當知人
生衣食之豐儉皆因前世修積之淺深今
日分應所受廼能節之則當來之福益厚
莫可量也果能如是則慈惠以及昆蟲豈

虛言哉

第四戒者不得淫邪敗真穢慢靈炁當守真
操使无缺犯

盖不淫邪者所以戒亂倫也夫有家者特
爲繼後承先而設故憑媒議通書聘明白

雨三

六

婚娶又爲酒食以召鄉黨僚友以厚男女
之別則夫婦之道禮所當然實不犯他人
之色又何淫之有娼妓之徒名曰下賤正
以其苟合亂人倫也若親此輩是與等矣
然前代仙師亦有遊戲妓門者盖或以試

鍊道心令見境不動或從化導有緣令背
塵合覺後之凡夫或引以證已實乃左道
濫遊真妄不同仙凡異致端人正士自善
主張未必溺於其所惑也其出家超俗者
皆因宿有善慶所以獨拔常倫果能頓息

塵緣斷絕色慾精修道行當證仙階福及
九祖慶流一門經曰仙人道士非有靈質
積精養炁以成真者此也然或初基未明
志節早宜修省以勗將來毋負善因復墮
塵網當守真操使毋缺犯則福德日新道

功可就矣

第五戒者不得敗人成功離人骨肉當以道助物令九族雍和

夫不敗人成功者蓋聞人有一善則贊和之聞有諸惡必當掩之使之成功不至喪

兩三

七

德又不離人骨肉者或見有親族不和父子夫妻兄弟師友因矛盾而至參商者當以道勸勉使之雍和令不離間則人倫不廢道義兩全實登真之要路也學道之士

宜各體知

第六戒者不得讒毀賢良露才揚己當稱人之美善不自伐其功能

蓋誠爲入道之門語者心之聲也語之妄由心之不誠也心既不誠而謂之道是謂背道求道无有是處但遇賢良而讒毀之

則露才揚己自伐功能皆非正士之所宜有必當稱人之美善庶幾成己之功勤此固學者之深戒也

第七戒者不得飲酒過差食肉違禁當調和氣性專務清虛

夫不飲酒者所以戒亂性也蓋酒本以行
禮浹洽和氣古人主賓百拜終日而不至
醉示有節也後人嗜慾无厭縱飲謀醉遂
至形骸顛倒禮法喪失或以致病或以構
禍罔覺其非儻隨平日酒量深淺減節飲

之不使過量又何亂性之有且食肉違禁
者如牛之有功犬之有義鴈之有序鯉鱸
朝斗此等之肉又安忍食之能推此心戒
而不食則可以調和氣性感格真靈專務
清虛而道業日新玄功時著矣凡所學者

宜自慎焉

第八戒者不得貪求無厭積財不散當行節儉惠恤貧窮

夫人之貧富命稟生初悉已前定若生財有分用盡還來若胎骨受貧廣求不富能

兩三

八

明此理一切取覓付之自然非己之財不妄取非義之財不苟得合得之財隨分取可不陷於貪求無厭之慾亦有積而不散致招殃禍者然吾黨之士先須識破幻假以惠恤貧窮節儉謹守隨緣度日勿苦貪

求常使心地虛閑物欲消遣久則自然與
道合真矣

第九戒者不得交游非賢居處雜穢當慕勝
已棲集清虛

夫初心出家未能獨立須仗叢林或結道
伴迤相扶持不至偏頗然友分三等有雲
朋霞友有良朋知友有狂朋恠友凡有志
節鍊心地究罪福絕塵情逍遙方外同志
相求遂與爲友此等謂之雲朋霞友以其
心與雲霞相似塵事礙他不住故也又有

習學經書高談闊論此等謂之良朋知友
以其不鍊心亦不能作惡故也又有一等
不治心地不習經典不顧罪福出語乖訛
作事狂橫觸著一毫便起爭鬭誇強逞俊
恃力恃勝欺壓良善相率成黨此等謂之

雨三

九

狂朋恠友此三等人身謝之後各有安置
去處隨其功業各得受報其雲朋霞友升
入无形遊宴玉京或爲神仙或爲天官其
良朋知友塵心未盡不出人倫其狂朋恠
友受了十分供養全無功德填還口債或

墮鄴都或墮旁生輪迴苦惱若到如斯悔
之何及如上三友宜審擇焉學者思之各
尋長便當慕勝已棲集清虛不負父母遺
子出家之心不孤
聖朝開教度人之意所宜體悉庶獲成功

第十戒者不得輕忽言笑舉動非真當持重
寡辭以道德爲務

按古云端謹嚴重不富即貴輕浮薄劣不
大即貧而輕忽語言脇肩諂笑曲學阿世
小人之歸實非正士之所宜有況持重寡

辭動客中式乃進道之要誠達者之所當
爲若能恪守力行何患乎高尚之不至歟

虛皇天尊初真十戒文終